

Parokia di Paradera ta prepara pa celebra su Hubileo di 70 Aniversario

ORANJESTAD (AAN): Diadomingo awor 8 di September Parokia di Paradera ta di fiesta pa recorda cu 70 aña pasa e misa di Paradera, Misa Santa Filomena a keda inaugura. E misa di Paradera ta un anhelo di e habitantenan di e bario di Paradera y bisindario.

Ya na comienso di añanan di 1930 e habitantenan di e tempo ey tabata kier nan propio misa. Señora Jacoba Erasmus-de Mey tabata bosero di esnan cu e anhelo aki. El a bay misa di playa pa haci un peticion na msgr Verriet pa traha un misa den e bario di Paradera. Asina aki tambe e anhelo a keda manifestá. Msgr. Verriet na aña 1935 a cuminsa reuni cu e habitantenan di Paradera, pero debi cu no tabata tin suficiente fondo y tambe door di segundo guerra mundial a stop cu e trabanonan temporalmente.

Despues di guerra a sigui cu e trabanonan. Dia 8 di September 1948, tabata e dia di gran fiesta, msgr Zeppenfeldt a bendiciona e misa. E misa a keda consagra na Santa Filomena

door di msgr Verriet kende a haci un promesa na e santu cu si e Islanan di Antiyas keda salba for di e di dos guerra mundial, e prome misa cu worde construi lo keda consagra na Santa Filomena. Asina aki e misa di Paradera y Parokia di Paradera a haya su patrona.

Pa prepara pa e gran fiesta aki lo tin un triduo durante e SS di Misa di diahuebs, diabierna y diasabra 5, 6 y 7 di september pa 7or di anochi na Misa Santa Filomena na Paradera. Ta spera cu parokianonan lo participa grandemente.

Pa conmemora e ocasion special di 8 di September di 1949, diadomingo awor pa 5or di atardi for di e parkeerplaats di Misa Santa Filomena lo sali cu un procesion pasando den cayanan den bisindario di misa. Orkestra Harmonica Aruba lo compaña e fielnan cu e canticnan durante e procesion. Ta recorda tur gruponan cu a haya invitacion pa participa na e procesion y pueblo en particular pa ta den misa no mas tarda cu cuarto pa cin-



co di atardi. Pa di e manera aki pa prepara pa sali cu e procesion na tempo. Pa 6or lo cuminsa cu e Santo Sacrificio di Misa Solem di gradicimento celebra pa msgr Gregorio Redoblado, Vicario General di nos Diocesis, concelebra pa Pastoor Canuto (Toti) Fuentebella, Pastoor di Parokia y demas sacerdotesnan presente. E SS di Misa aki lo keda canta pa Koor Uni di Parokia di Paradera cu canticnan di misa na latin. E SS di Misa ta conta

cu presencia di mandatario y invitadonan special. Ta pidi tur fiel pa ta tempran na misa. Despues di Santo Sacrificio di Misa lo sigui un actividad social-cultural den Centro Caiqueto. Durante e actividad den Centro Caiqueto lo honra algun di e Cooperadorman di Parokia di Paradera cu pa añanan largo a presta nan servicio y cooperacion na beneficio di Iglesia por medio di Parokia Santa Filomena. Pa e ocasion aki a saca durante e ultimo si-

mannan invitacion publico pa parokianonan di Paradera. Ta recorda tur esnan cu a registra y reserva, pa presenta nan carchi di entrada na porta. Pa e parokianonan cu no a logra registra ainda, tin algun carchi ainda obtenibel na porta.

Pastoor Canuto (Toti) Fuentebella hunto cu e Comision Organizado Hubileo 70 Aniversario di Parokia Santa Filomena ta invita un y tur pa participa na Misa, Procesion, y Celebracion.